

<><><><><><>

Headlines

- विदेश मंत्री डॉ. एस जयशंकर होरें इक निरपक्ख ते निगगर संयुक्त राश्ट्र दा आह्वान करदे होई आखेआ ऐ जे कश्मीर पर कब्जा करने लेई कीते गेदे हमले कारण गै एह मुद्दा बनी गया ऐ।
- केंद्री रेलवे मंत्री अश्विनी वैष्णव होरें आखेआ ऐ जे जम्मू ते श्रीनगर बश्कार सिद्दी रेल सेवा तौले शुरू होई जाग।
- भारत सरकार दा आखना ऐ जे जम्मू-कश्मीर च 15 लक्ख कोला मते ग्रामीण परिवारें तगर नलके राएं पीने दा साफ पानी पुज्जा करदा ऐ।
- जे.के.पी.एस.सी ते जे.के.एस.एस.बी नै पिछले दऊं बरें दौरान 11 ज्हार 500 कोला मतियां खाली सामियां पुर कीतियां न।
- उपराज्यपाल मनोज सिन्हा होर औंदे ऐतवारें जम्मू दे अभिनव थिएटर च 'तवि फिल्मोत्सव 2025' दा उद्घाटन करडन।

<><><><><><>

EAM-POK

विदेश मंत्री डॉ. एस. जयशंकर होरें रायसीना डायलाग-2025 च बोलदे होई इक्क निरपक्ख ते निगगर अंतरराश्ट्री बवस्थ दी लोड पर जोर दित्ता ऐ। कश्मीर पर पाकिस्तान दे नजैज कब्जे दे कन्नै भारत दे अनुभव पर लोड पांंदे होई उनें इसी दुए विश्व युद्ध दे परेंत कुसै खेत्तर पर सब्भनें शा लम्मे समें तगर चलने आहले गैर कनूनी कब्जा दस्सेआ। उनें आखेआ जे जदू के भारत नै संयुक्त राश्ट्र दे राहें समाधान दी मंग कीती, पर जेहडा इक्क हमला हा उसी विवाद दे रूपा च पेश कीता गेआ। विदेश मंत्री होरें इक्क निगगर ते निरपक्ख संयुक्त राश्ट्र दा आह्वान कीता। उनें इस गल्लै पर जोर दितता जे स्थाई शांति गी सुनिश्चित करने ते सम्प्रभुता गी कायम रखने लेई वैश्विक मानदंडें गी बराबर रूप कन्नै लागू कीता जाना चाइदा।

<><><><><><>

Train-Service JK

केंद्री रेल मंत्री अश्विनी वैष्णव होरें अज्ज लोकसभा च घोषणा कीती जे तौले गै जम्मू गी रेल गड्डी राहें श्रीनगर कन्नै जोड़ी दित्ता जागं वैष्णव होरें अपने संबोधन च आखेआ जे उनेंगी जम्मू गी रेल गड्डी राहें श्रीनगर कन्नै जोड़ने दे लम्मे चिरै थमां दिक्खे जा'रदे ख्वाब गी पूरा करने पर बड़ा गै गर्व मसूस होआ करदा ऐ। उनें आखेआ जे एह रेल सेवा तौले गै शुरू होई जाहग ते रेलवे सुरक्षा दे मुख्ब आयुक्त दियें अखीरी सफारिशें गी लागू कीता जाग। वैष्णव होरें जोर देइयै आखेआ जे इक्क बारी जिस्सलै सफारिशां लागू करने दी प्रक्रिया सबूरी होई जंदी ऐ ते फी रेलवे सुरक्षा दे मुख्ब आयुक्त हरी झंडी देई दिंदे न तां फी जम्मू थमां श्रीनगर तगर रेल सेवा शुरू होई जाग। उनें

आखेआ जे एहदे कन्नै लोकें आस्तै संपर्क ते सुविधा बधी जाग। इस मौके पर अगो बोलदे होई रेल मंत्री होरें आखेआ।

<><><><><><>

JJM-JK LS

लोकसभा च अज्ज पेश कीते गेदे आंकड़ें मूजब जम्मू-कश्मीर केंद्र शासित प्रदेश च जल जीवन मिशन तैहत 81 इशारिया 0-6 प्रतिशत घरें च नलके राएं पीने आहला पानी पुजजा करदा ऐ। एहू आंकड़े केंद्र शासित प्रदेश दे ग्रामीण इलाकें देन जिसलै जे राश्ट्रीय सतह पर ग्रामीण इलाकें च नलके राएं पानी 79द इशारिया 9-1 प्रतिशत घरें तगर पुज्जै करदा ऐ। बारामूला थमां सांसद शेख रशीद हुंदे आसेआ अज्ज लोकसभा च पुच्छे गेदे इक सोआलै दा परता दिंदे होई जलशक्ति राज्यमंत्री वी. सोमन्ना होरें दस्सेआ जे अगसत 2019 च जलशक्ति मिशन दे शुरू होने कोला लेइयै हुनै तगर 9 लक्ख 84 जहार नमें परिवारें गी घरें च पीने लेई नलके राएं पानी उपलब्ध कराया गेआ ऐ। उनें दस्सेआ जे गांदरबल ते श्रीनगर जिलें च हर इक घरै तगर पीने आहला पानी नलके राएं पुज्जा करदा ऐ जिसलै जे अनंतनाग, शोपियां, रियासी ते बडगाम जिलें च बी ग्रामीण इलाकें च खरी मती गिनतरी च पीने आहला पानी, होर नमें परिवारें तगर पुज्जा ऐ। मंत्री होरें दस्सेआ जे इन्दे मकाबले च किश जिलें अजे पिच्छे बी ऐन जित्थे ग्रामीण इलाकें च सारे घरें तगर पानी नलके राएं नेही पुज्जा। जम्मू जिले दे ग्रामीण इलाकें च 66 इशारिया 4 प्रतिशत, राजौरी च 65 इशारिया 9-8 प्रतिशत ते साम्बा जिले च 67 इशारिया 3-7 प्रतिशत, अजेंकि पिछले 4 बरें च इस कम्मै लेई सुद्दे फंड बी उपलब्ध होए न।

<><><><><><>

Jal-Shakti Samba

जल शक्ति मंत्री जावेद अहमद राणा होरें विधानसभा गी जानकारी दित्ती ऐ जे कि साम्बा जिले च जल जीवन मिशन दे तैहत 391 करोड़ 57 लक्ख रपे दी लागत कन्नै पानी सप्लाई दियां 130 स्कीमां शुरू कीतियां गेदियां न। अज्ज सदन च सुरजीत सिंह सलाथिया हुंदे आसेआ पुच्छे गेदे इक सोआलै दा परता दिंदे होई उनें दस्सेआ जे 391 करोड़ 57 लक्ख रपे दी कुल रकमै चा 179 करोड़ 10 लक्ख रपें दी लागत कन्नै 83 स्कीमां अजे तोड़ी मुकम्मल करी लैती गेदियां न।

<><><><><><>

IED-Shopian

शोपियां जिले दे हबदीपोरा इलाके च अज्ज इक आई.ई.डी दा समेंसिर पता लग्गी जाने नै कुसै बड्डी माड़ी घटना कोला बचाऽ होई गेआ ऐ। आई.ई.डी दा पता लगदे गै बम्ब नकारा करने आहले दस्ते गी दस्सेआ गेआ जिन्नै तुरत इसी बेल्ला रौहंदे नकारा करी दित्ता। पिछले 2 दिनें दौरान एहू इस चाल्ली दी दुई घटना ऐ। एहदे शा पैहले कल संगारें बी कुलगाम च इससै चाल्ली इक आई.ई.डी दा पता लाइयै उसी नकारा करी दित्ता गेआ हा।

<><><><><><>

JK-Recruitment

जम्मू-कश्मीर लोक सेवा आयोग (JKPSC) ते जम्मू-कश्मीर सेवा चयन आयोग (JKSSB) नै दो बरें च 11 ज्हार 526 खाली पेदियें असामियें गी पुर कीता ऐ। विधायक बशीर अहमद वीरी हुंदे इक्क सुआल दे परते च सरकार नै विधानसभा गी दस्सेआ जे JKSSB नै 2023 ते 2024 च 2 ज्हार 175 असामियां पुर कीतियां, जदूं के JKSSB नै इनें 2 बरें च 9 ज्हार 351 असामियें गी पुर कीता। JKSSB नै 2023 च 3 ज्हार 695 ते 2024 च 5 ज्हार 656 असामियें गी पुर कीता। एहदे कन्नो-कन्नो इनें दवें भर्ती एजेंसिएं 2 बरें च बड़ी बड़ी महत्वपूर्ण गिनतरी च असामियें गी जारी कीता जित्थे JKPSC नै 3 ज्हार 296 नमीं असामियें गी जारी करने दी घोषणा कीती, उत्थें गै JKSSB नै इससै असें च 5 ज्हार नमीं असामियें गी जारी करने दी घोषणा कीती।

<><><><><><>

LG Tawi-Filmotsva

उपराज्यपाल मनोज सिन्हा होर 23 मार्च, 2025 गी जम्मू दे अभिनव थियेटर च जम्मू-कश्मीर सिने एसोसिएशन आसेआ आयोजित इक लघु फिल्म महोत्सव 'तवी फिल्मोत्सव' दा उद्घाटन करंगन। इस महोत्सव दा उद्देश्य जम्मू-कश्मीर दे फिल्म निर्माताएं ते कलाकारें गी खेत्तर दी सांस्कृतिक विरासत गी बढ़ावा दिंदे होई अपनी प्रतिभा दा प्रदर्शन करने आस्तै इक्क मंच प्रदान करना ऐ। विजेताएं गी नकद ईनाम दित्ते जांगन, जेह्दे च शीर्ष विजेता आस्तै 10 ज्हार रपे दी ईनामी राशि बी शामिल ऐ। जजें दा इक मन्ने-परमन्ने दा पैनल महोत्सव च पेश कीती जाने आहली प्रस्तुतियों दा मूल्यांकन करोग जेदे नतीजे उससै दिन घोषित कीते जांगन। एहू कार्यक्रम जम्मू-कश्मीर च सांस्कृतिक अभिव्यक्ति आस्ते इक नमां मानदंड स्थापित करने दा वायदा करदा ऐ।

<><><><><><>

Rajouri-Fire

राजौरी दे सरकारी मेडिकल कॉलेज च अज्ज अगग लगगने दी इक घटना पेश आई जेदे च मकामी प्रशासन नै तुरत इक बड़ा बचाव अभियान शुरू कीता। स्हाड़े जिला संवाददाता शक्ति शर्मा नै जानकारी दिती ऐ जे अगग अस्पताल दी बेसमेंट च लगगी ते बड़ी तेजिया कन्नै फैलन लगी जेदे करी मरीजें ते उन्दे तीमारदारें च डर-त्राह फैली गेआ। बचाव एहू होआ जे कुसै दी जान नेई गेई ते ना गै कोई फकोआ जा जखमी होआ। जिला विकास कमिशनर अभिषेक शर्मा होरें घटना दे बाद उत्थै पुज्जियै अगग लगगने दा कारण पता करने दा हुक्म जारी कीता। स्हाड़े संवाददाता कन्नै गल्ल करदे होई डी.सी होरें दस्सेआ।

<><><><><><>

RSETI-Ramban

रामबन दे सेरी इलाके च ग्रामीण महिलाएं गी आत्मनिर्भर बनाने दे मकसद कन्नै खडौने बनाने दी सिखलाई देने लेइ, 13एं दिनें दा इक कार्यक्रम शुरू कीता गेदा ऐ। भारतीय स्टेट बैंक दे ग्रामीण स्वरोजगार सिखलाई संस्थान RSETI आसेआ जम्मू-कश्मीर ग्रामीण आजीविका मिशन कन्नै रलियै शुरू कीती गेदी इस पैहल दा मकसद इस

दौरान 30 महिलाएं गी खडोने तैयार करने दी सिखलाई देना ऐ तां जे ओहू अपने पैरें पर खडोई सकन, उन्दी औंदन च बाद्दा होऐ ते कन्नै घरेलू उत्पादें गी बढावा थ्होऐ। इस मौके बोलदे होई RSETI रामबन दे डरैक्टर हरविंद्र सिंह होरें आखेआ।

<><><><><><>

PM-MKB

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 30 मार्च गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एहू 120मीं किश्त होग। कार्यक्रम च शामिल करने लेई लोक अपने बचार ते सुझाहू 28 तरीक तगर टोल फ्री नंबर 1800-11-7800 पर भेजी सकदे न। एह्दे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एहू कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एह्दे कन्नो कन्नी एह्दा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफ्तर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एह्दा डोगरी च अनुवाद प्रसारत कीता जाग। एह्दा डोगरी अनुवाद तुस रातीं 8 बजे इक बारी परतियै सुनी सकदे ओ।

<><><><><><>